

清詩話



梅村詩話序

吳祭酒詩話一卷乙未歲余讀書胥江之感德菴祭酒元孫翔洽時僑寓廣陵甥館過從頗密見其篋中攜此帙蓋先生手書稿本中多改竄有塗乙不可辨者余譯而錄之附諸集後帝虎之訛知不免焉小鐵山人楊學沆



梅村詩話

太倉吳偉業駿公著

無錫丁福保仲祜訂

宋攷字文玉別字九青萊陽人年十九登乙丑進士由吏科給事中陞太常寺卿進戶部侍郎以枚卜遇譴歸城陷不屈死其父尙寶卿繼登夢李北地至其家而得攷少穎異爲詩學少陵愛蒼渾而斥婉麗然不無躊躇當其合處不減古人日課五言詩一首爲亞卿將大用遽嬰疾卒年尙未四十集竟散佚不傳嘗與余同使楚楚嘉魚熊魚山竟陵鄭澹石俱九青同年到武昌相訪鄭詩亦清逸其贈什曰剖斗折衡爲文章天下婁東與萊陽謂吾兩人也九青登黃鶴樓過小孤皆有詩今失記唯憶其掖中言懷一聯云朋友誰與生死問朝廷今作是非看時上方切治苞苴而金吾徼卒乘之反行其姦利貪吏放手無罰而寸蹏尺縑輒加逮治九青之語蓋實錄也過南中有云艸迷三國樹水改六朝山九青曰天下之山未有不由水改者其用意精刻如此

陳子龍字臥子雲間華亭人由丁丑進士攷選兵給事中徇節死友人宋轅文收其遺稿今並存臥子負曠世逸才年二十與臨川艾千子論文不合面斥之其四六跨徐庾論策視二蘇詩特高華雄渾睥睨一世好推崇右丞後又摹擬太白而少陵則微有異同要亦崛強語非由中也初與夏考功璣公周文學勒卣徐孝廉闇公同起而李舒章特以詩故雁行號陳李詩繼得轅文又號三子詩然皆不及當是時幾社名聞天下臥子奕奕眼光意氣籠罩千人見者莫不辟易登臨贈答淋漓慷慨雖百世後猶想見其人也嘗與余宿京邸夜半謂余曰卿詩絕似李頃又誦余雒陽行一篇謂爲合作余曰卿詩固佳何首爲第一臥子曰苑內一作禁苑起山名萬歲閣中一作複宮新戲號千秋此余中聯得意語也祠官流涕松風路回首長陵出塞年又李氏功名猶帶礪斷霞落日海雲黃此余結法可誦者也余贊嘆久之晚歲與夏考功相期死國事考功先赴水死臥子爲書報考功於地下誓必相從文絕可觀而李舒章仕而北歸讀臥子王明君篇曰明妃慷慨自請行一代紅顏一擲輕則感

慨流涕。舒章久次諸生不遇，流離世故，貽勉一官，反葬請急，遇臥子於九峯山中，期滿北發，未渡江而臥子及禍。舒章鬱鬱道死雲間，有爲詩唁之者曰：蘇李交情在五言，未嘗不寄慨於此兩人也。

楊廷麟字伯祥，別字機部，臨江人。爲文排盪峭刻，在韓蘇間。書法出入兩晉，倣素靖體。詩則好用奇思棘句，不甚合律。然秀異聳拔，往往出入機部偕臥子同出吾師姜新建之門。以文章節氣相砥礪，旣遇黃石齋先生於京邸，一見道合，負道節，好強諫。上書論閣部楊嗣昌失事罪，得旨改兵部贊畫參督師盧象昇軍事。余贈之詩曰：諸將自承中尉令，孤臣誰給羽林兵。蓋紀實也。盧與閣部議軍事不合，遇機部相得甚。已而中外異心，兵勢日蹙，盧自謂必死，顧參軍書生徒共死無益，乃以計檄之去。機部不知也。機部至孫侍郎傳庭軍前六日，而盧公於賈莊徇難，乃求得其尸，抱之痛哭。盧公之死，有馬士抱之，傷不深。機部詩云：死君旁者一掌牧，通首俱妙。惜佚落不全。又憶其渾河詩中聯云：春至軍中草木冤，亦奇句。機部自盧公死後，其策益不用，無聊生。會詔詰督師死。

史作陳誤

兵在

狀賈莊前數日督師誓必戰顧孤軍無援聞太監高起潛

史作陳誤

潛

入

近則大喜於真定野廟中倚土銼作書約之合軍高竟拔營夜遁督師

用無援故敗機部受詔直以實對慈溪馮鄴仙得其書謂余曰此疏入

機部死矣爲定數語機部聞之則大恨先是嗣昌遣部役張姓者

林列傳云愈渾名貂鼠蓋以縫皮爲業者

偵賈莊而其人白盧公死狀流涕動色嗣昌榜笞之楚

毒備至口無改辭呼曰死則死耳盧老爺忠臣吾儕小人敢欺天乎遂

以考死於是機部遺書馮與余曰高監一段竟爲刪郤後世謂伯祥不

及一部役耶然機部竟以此得免余詩又有曰憂深平勃軍南北疏訟

甘陳誼死生亦實事也已而機部過宜興訪盧公子孫再放舟婁東與

天如師及余會飲十日嘉定程孟陽爲畫鬚參軍圖錢東澗作短歌余

作臨江參軍一章凡六十韻余與機部相知最深於其參軍周旋最久

故於詩最眞論其事最當即謂之詩史可勿愧機部後守贛州從城上

投濠死集竟散佚不傳

機部隆武中進兵部尚書東閣大學士開府南贛丙戌月初四日死難

龔鼎孳字孝升廬州合肥人甲戌進士授蘄水知縣丙子余與九青使

楚而孝升分一經最得士相知爲深後考選給事中入本朝爲太僕寺少卿中間流離患難幾不免庚寅秋於臨清舟中報余書曰庾樓之別垂十五年壬午以前猶得時通音驛運移癸甲大棟漸傾妄以狂愚奮身刀俎甫離獄戶頓見滄桑續命蛟宮偷延視息墮阤落塹爲世慙人先生方霞引碧山之巔鴻舉青雲之外西薇東菊萬仞難躋自顧平生曾邀盼飾相期何等蹉跌至今所以伏處蓬蒿欲有陳而未敢也停舫金闈竊幸龍門在望展晤有期而先生旣抱騎省之傷賤子亦迫王猷之棹何圖咫尺復成參商唯從同人處見先生尺幅寸幘片言隻字寶若明珠大貝火齊木難攬持芳華以當瞻侍耳客秋至白門拜發良書欣聞警欵蹶然頑懦復起爲人感念疇曩泣焉雨泣自傷末路尙爲知已所收憐使得齒於舊游之末中間情文溫縟慰諭綢繆金錯玉盤美人事之遺我厚矣伏蒙不棄鄙陋垂問雕蟲先生留意文章超絕前軌馬班屈宋蔚有兼長燭火至微何敢妄希扶桑之燿且身旣敗矣焉用文之顧萬事瓦裂空言一縷猶冀後世原心宣鬱遣愁亦惟斯道往在燕

邱與秋岳舒章諸子各有抒寫篇軸遂繙近年以來蓬轉江湖仲宣登樓衿情難忍嗣宗懷抱歌哭無端未極斐然不無驅染然前則魂魄初召瑟既苦而難調繼乃離索寡羣刀雖操而未善亟思大雅提振小巫九合葵邱舍公誰屬方當悉索敝賦奉鞭弭於中原不敢煩包茅之討也此行粗了殘局即歸臥松筠興會適來扁舟相就極論千古殫精百氏備孔門之游夏偶鄴下之應徐庶幾餘生不同艸木先生著作雷霆天壤氣象名山亦肯示雌霓於王筠授論衡於中郎否耶此書至余發之於相知讀者無不以爲徐庾復出也孝升於詩最秀穎高麗聲調遒緊有義山之風余嘗憶其潤州一首中聯云亂後江聲猶北固坐中人影半南冠激昂慷慨猶是此書大意可爲三歎

女道士卞玉京字雲裝白門人也善畫蘭能詩好作小詩嘗題扇送余兄志衍入蜀一絕云剪燭巴山別思遙送君蘭楫渡江皋願將一幅瀟湘種寄與春風問薛濤後往南中七年不得消息忽過尚湖寓一友家不出余在東澗宗伯坐談及故人東澗云力能致之呼輿往迎續報至

矣已而登樓託以妝點始見久之云痘疾驟發請以異日訪余山莊余詩云緣知薄倖逢應恨恰便多情喚郤羞此當日情景實語也又過三月爲辛卯初春乃得扁舟見訪共載橫塘始將前四詩書以贈之而東湖讀余詩有感亦成四律其序曰余觀楊孟載論李義山無題詩以爲音調清婉雖極其濃麗皆託於臣不忘君之意因以深悟風人之旨若韓致光遭唐末造流離閩越縱浪香筭蓋亦起興比物申寫託寄非猶夫小夫浪子沈湎流連之云也頃讀梅村豔體詩聲律妍秀風懷惻愴於歌禾賦麥之時爲題柳看桃之作旁皇吟賞竊有義山致光之遺感焉雨窗無聊援筆屬和秋蛩寒蟬噪吟啁哳豈堪與間關上下之音希風說響乎河上之歌聽者將同病相憐抑或以同牀各夢而輒爾一笑也詩絕佳以其談故朝事與玉京不甚切故不錄末簡又云小序引楊眉庵語義山臣不忘君語使騷人詞客見之不免有兔園學究之誚矣然他日黃閣易名都堂集議有彈駁文正二字出余此言爲證明可以杜後生三尺之喙亦省得梅老自下注脚其言如此玉京明慧絕倫書

法逼真黃庭。琴亦妙得指法。余有聽女道士彈琴歌及西江月醉春風  
填詞。皆爲玉京作。未盡如東澗所引楊孟載語也。此老殆借余解嘲。  
湯燕孫字元異。姑熟人。褚山懷古二首云。赤鑄山頭鳥不飛。上皇曾此  
易青衣。無多侍從爭投甲。有限生靈但掩扉。五國城西邊月苦。景陽樓  
下暮鐘微。傷心莫唱淋鈴曲。未得生從蜀道歸。淚逐天風向北揮。山僧  
指點舊重圍。翠華東駐泉偏咽。代馬南來艸不肥。野老久知今日事。先  
臣猶護昔年非。延秋門外王孫盡。司馬元戎白錦衣。二詩於乙酉五月  
事極切哀婉淒節。使人不忍讀。武塘夏雪子極偁之。

周鍾字介生。以陷賊汚僞命。自投南歸。南中誣其賀賊表有堯舜湯武  
語。論斬西市。其實乃張麟然陝西賀表語。非鍾筆也。麟然庚辰進士。以  
西安知府降賊。曾以語人曰。偶爲此語。不意爲政府皇上所見賞。又自  
請循宮。手棄太廟神主於外。其死也。叩頭流血。口偁皇上。臣該萬死。蓋  
爲天所誣云。鍾以文章負海內重名。不能徇節。死固其罪。獨爲黨人所  
殺。誣以大逆。則冤甚矣。雲間李雯親見其事。曾爲詩哭之曰。亂世身命

可自由恨君不及鄭虔州。勸秦新論誰曾草。月旦家評總世讎。鍾從兄曰鑣。字仲馭。亦負重名。相忌積不能平。聞此言。卽仲馭文致。竟以他獄與鍾同死。家評蓋指此也。

楊機部徇節後云已無子。有康小范孝廉來吳門。攜機部在贛州詩十餘首。并言其子尙在小范與機部同事。兵敗被縛下獄。瀕死而免。吳門棄聖野贈之詩曰。盧諶流落劉公死。回首章門一惘然。亦俠烈士也。余後訪機部子知在寧都山中。寧都有彭同者爲機部門人。以諸生特授職方郎。監總兵順慶軍。順慶之復寧都也在金王舉事時。機部已前死矣。己丑正月。南贛總兵胡有陞破寧都。職方曰。吾以書生受思陵不次之遇。不可以不死。與其妻皆自縊。寧都被兵大掠。機部之子亦在掠中。職方之弟曰彭士望者。亦機部門人。訪知之。以三百金贖得。并求得其母子置一處。此兩彭君者可謂不負機部者也。機部詩寄李尙書云。朝聞驛使向江樓。虎張魚文燿列侯。戎服晝銷南浦雨。漢家雲護北陵秋。空同山下看雙節。天柱灘頭領八州。今日傳呼新僕射。臨淮依舊擁貂。

裘過惶恐灘云空山夕照深江樹明月灘聲下石城愁盡關河極北望如今虎豹正縱橫鶴猿自在灘邊宿江漢飄零夢幾還遂使南州爲異域知君何處塞函關丙戌元日云黃華嶺外瑞雲齊白露洲前戰馬嘶五道將軍臨直北三江父老望征西春風斗帳降銅馬細雨戈船鬪水犀此日建康應拜舞近臣還解賦鳬鷺又一首朝元帳下領高班稽首春風動百蠻九葉雲雷開萬國一時江漢擁三山宮中勝帖盤龍出杖裏芳尊藉草頌從此鎬京傳盛事年年虎豹度天關丙戌九日云河西獵火照高樓五嶺風光異昔游木葉寒雲看戍晚菊花宜雨漢宮秋山城野幔開三市江表輕裘署九州旦晚功成萸釀熟憑君一笑舊田疇又次首僅記其中聯云將軍話嘯多文吏羣盜縱橫半舊臣機部詩學素拗折此竟高渾深麗軍中從容慷慨戎服賦詩具見整暇七年不見其學問之進益如此

圓鑒靈隱僧故練川大家子也父兄死國事其哭江東詩曰平原曲罷人何在越絕書成事已非人多稱之已而被收亡命爲僧在揚州有過

天甯寺見放馬歌最悲壯詩曰法窟聊藏獅子花空山爲指金鞭影神駿惟應支遁看舊恩不願孫陽顧垂頭肯向朔風嘶烙印猶存漢家字寄兄研德云歸期似夜長難曉別夢如秋遠更清竟以疾沒於靈隱友人周子傲舊與游過其地爲詩弔之曰袁尹全家赴汨羅九闕夢夢訴如何只今靈隱猿三叫怕聽天甯放馬歌又曰寺樓遙挂海門潮鷺嶺龍宮夜寂寥精衛不知何處去冷泉亭下獨吹簫

黃媛介嘉興人儒家女也能詩善畫其夫楊興公聘後貧不能娶流落吳門媛介詩名日高有以千金聘爲名人妾者其兄堅持不肯余詩曰不知世有杜樊川指其事也媛介後客於虞山柳夫人絳雲樓中樓燬於火東澗亦牢落嘗爲媛介詩序有今昔之感吳嚴子偕其女卞元文皆有詩名媛介相得甚媛介和余詩曰月移明鏡照新妝閨閣清吟已雁行花裏雙雙巢翡翠池中六六列鴛鴦黃粱熟後遲仙夢白雪傳來促和章一自蓬飛求避地詩成何處寄蕭娘罷吟紈扇禮金仙欲洗塵根返自然風埽桃花餘白石波呈荷葉露青錢山中自護燒丹井世上

誰耕種玉田。磊磊明珠天外落。獨吟遙對月平川。石移山去草堂虛。漫理琴尊葺故居。閒教癡兒頻護竹。驚聞長者獨回車。牽蘿補屋思偏逸。織錦成文意自如。獨怪幽懷人不識。目空禹穴舊藏書。往來何處是仙壇。飄忽回風降紫鸞。句落錦雲驚韻險。思繁彩筆惜才難。花飛滿徑春情淡。水漲平隄夜雨寒。憶昔金闈曾比調。莫愁城外小江干。此詩出後屬和者甚衆。妝點閨閣過於綺靡。黃觀只獨爲詩非之。以爲媛介德勝於貌。有阿承醜女之名。何得言過其實。此言最爲雅正云。

林衡者。莆田人。少游黃忠烈之門。以壬辰二月來婁東。所箸詩古文詞數十卷。詩蒼渾深秀。古文雅健有法。其行也。余贈以詩。有五月關山樹影圓送君吹笛柳陰船之句。已而道阻。再游吾州。則秋深木落。鄉關烽火。南望思親。旅懷感咤。有聽鐘鳴悲落葉之風焉。其客中言懷四首曰。南方方震蕩。爲客久堪悲。海內親朋少。兵間道路遲。無衣霜落後。不寐月明時。孰伴城頭柝。烏號向北枝。音書不能寄。萬里鳥空回。壁壘連三月。乾坤動七哀。高秋聊看菊。夜月自空臺。淚眼涓涓甚。憑誰辨劫灰。干

戈傳更甚.多病在長途.幾月來霜雪.家鄉問有無.雲孤滄海雉.身傍夕  
陽烏.含愧看秋色.蒼蠅得壯圖.幾次逢親故.途窮不敢言.關梁判一醉.  
鳥雀總千村.樹立清商色.江消野岸痕.二毛潘岳見.貧病媿私恩.殺氣  
何時盡.閩方亂不停.荔支愁萬騎.牛女怨雙星.露白隨風柳.猿曉滿石  
屏.身經兵火慣.長醉不須醒.衡者詩文極多.以閩南不辨四聲.多拗體.  
此五首駸駸江南風致矣.

蒼雪師.雲南人.與維揚汰如師生同年月日.相去萬里.而法門兄弟.氣  
誼最得.蒼住中峰.汰住華山.人以比無著天親焉.汰公早世.其徒道開  
能詩兼書畫.後亦卒.而蒼公年老有廢疾.然好談詩.以壬辰臘月過草  
堂.謂余曰.今世禪禪盛行.一大藏教.將墜於地矣.且無論義學.卽求一  
詩人.不可復得.乃幸與子遇.我襍被來.不曾攜詩卷.當爲子誦之.是夜  
風雪大作.師語音儉重.撼動四壁.痰動喉間.咯咯有聲.已呼茶復話.不  
爲倦.漏下三鼓.得數十篇.視階下雪深二尺矣.當其得意.軒眉抵掌.慷慨  
擊案.自謂生平於此證入不二法門.禪機詩學.總一參悟.其詩蒼深

清老沈著痛快當爲詩中第一不徒僧中第一也余憶其贈方密之中聯云山中久不見神駿世上人多好畫龍贈百史五六聯句云霜氣一湖飛遠夢月明今夜宿孤峰朝來無限塵中事回首西山路幾重金山詩中兩聯云古今僧住老日夜水朝東塔閃中流火帆來四面風清涼臺懷古云薰風不見吹人醉春雪無聲到地消焚筆詩云土塚不封毛盡禿鐵門斷限字原無欲來風雨千章埽望去蒼茫一管枯皆絕唱也師有和余西田賞菊詩有獨擅秋容晚節全全字落韻和者甚衆無出師上者其金陵懷古四首最爲時所傳師雖方外於興亡之際感慨泣下每見之歌詩嘗自詠云翦尺杖頭挑寶誌山河掌上見圖澄休將白帽街頭賣道衍終爲未了僧益以見其志云

瞿式耜字稼軒常熟人由進士爲兵科給事中好直諫爲權相所訐與其師錢宗伯同罷歸築室於虞山之下曰東臯極游觀之勝酷嗜石田翁畫購得數百卷爲耕石軒藏之未幾里中兒輩文誣染偕宗伯逮就獄余時在京師所謂東臯草堂歌者贈稼軒於請室也後數年余再至